



Las Squadras

1

Informaziuns generalas e messadi tier la radunonza communal dils 1 da matg 2019

Messadi per la radunonza communal dils 01-05-2019

Messadi per la radunonza communal dils 01-05-2019 allas 20.00 uras a Rabius

La suprastonza communal suttametta a Vus las suandontas fatschentas:

1. Avertura e beinvegna
2. Elecziun da 2 dumbravuschs
3. Protocol dalla davosa radunonza communal dils 14-12-2018
4. Tractaziun e concessiun dil credit brut da 250'000 francs per la planisaziun dil project Lag Salischnas
5. Tractaziun ed approbaziun dil project canalisaziun e serenera Pardomat Dado e concessiun dil credit brut da 145'000 francs
6. Tractaziun ed approbaziun dil project sanaziun mir santeri Sumvitg e concessiun dil credit brut da 960'000 francs
7. Tractaziun ed approbaziun dalla revisiun parziala dil plan general d'avertura Rabius/Marias
8. Tractaziun ed approbaziun dalla revisiun parziala dil plan general d'avertura Laus
9. Orientaziuns
10. Varia

Tractanda 3: Protocol

Il protocol dalla radunonza communal dils 14-12-2018 ei staus exponius public e disponibels sin la pagina d'internet naven dils 11-01-2019 durant 30 dis. Il protocol sa vegnir abbonaus. Ils cuosts da porto da frs. 2.50 per protocol vegnan tschentai a quen als abbonents.

Tractanda 4: Tractaziun e concessiun dil credit brut da 250'000 francs per la planisaziun dil project Lag Salischnas

L'Uniun Lag Salischnas ha el decuors dils davos onns dedicau bia temps all'idea da realisar in lag da far bogh a Salischnas e cun grond engaschi elaborau in project cun il tetel „Lag Salischnas“. La finamira dil project ei da realisar ina zona da sport e recreaziun cun in lag da far bogh ed in lag da pescar. Plinavon eis ei vegniu ponderau davart la realisaziun d'ina tratga da pèschs industrial

cun in project separau. Il project Salischnas sustegn las breigias dalla Surselva da rinforzar a liunga vosta il turissem da stad e da crear ulteriuras purschidas per ils indigens e hosps. Entras il project duei il svilup dalla Surselva vegnir promoviu e novas plazzas creadas ella vischnaunca da Sumvitg.

Per saver presentar allas votantas ed als votants in project che survegn las lubientschas corrispundentas ed ord vosta dall'economia da menaschi cun rentabilitad persistenta sto en rama d'in preproject vegnir fatg differentas examinaziuns.

Denter auter las suandontas:

- svilup dil project e mussament dalla rentabilitad
 - concepziun dil cuntegn e dallas purschidas
 - calculaziun dil volumen d'investiziuns
 - plan dil quen da gudogn e sperdita sur plirs onns
- sclariment da realisabladad dil lag da far bogh
- dislocaziun dallas lingias da tensiun auta entras la *Swissgrid AG*
- integraziun dalla revitalisaziun dil Rein el project



Lag da Salischnas existent

Il project „Lag Salischnas“

L'idea d'in lag da far bogh a Salischnas ei naschida gia igl onn 1997. Igl onn 2013 ei l'idea vegnida sviluppada vinavon entras ina grupp d'interess. En rama dil project da revitalisaziun dil Rein Anteriu han giu liug discuors cugl uffeci per la natira ed igl ambient. Igl uffeci per economia e turissem dil cantun Grischun sustegn il project cun ina contribuziun considerabla en connex cun la nova

politica regionala (NRP). La suprastanza communal ha priu positiv enconuschientscha dil project e sustegn la revitalisaziun dil Rein Anterior sche la zona da sport e recreaziun „Lag Salischnas“ sa vegnir realisada.

La vischnaunca da Sumvitg e l'Uniun Lag Salischnas vulan a liunga vosta procurar cul project per impuls economic ella regiun.

La porschida dil „Lag Salischnas“ duei plidentar in segment da hosps activ e che s'interessescha per la natira. Entras ils avantatgs dil potenzial dall'infrastructura naturala e culturala ch'ei avon maun sedifferenziescha il „Lag Salischnas“ sin fiera. Ensem cun la revitalisaziun dil Rein cun il territori natural protegiu s'eresulta ina schanza unica da realisar in project singular.

Il „Lag Salischnas“ duei sesviluppar tier ina porschida da recreaziun regionala cun multifaras pusseivladads da sedivertir en accord cun la natira. Las pusseivladads da sedivertir secumpnan d'activitads da sport sco pescar, viagiari, ir cun velo, observar la natira, ir cun canu eav. e pren en mira in niev segment da hosps. Igl unviern duei il „Lag Salischnas“ plidentar ils currider da cuorsa liunga cun in'infrastructura e porschida da loschament adattada.

Las examinaziuns davart la realisabladad pertuccont la rentabilitad muossan che potenzial ei avon maun. Cun la realisaziun dalla zona da sport e recreaziun incl. porschidas novas ed attractivas da loschament duei vegnir procurau annualmein per 20'000 ulteriuras pernottaziuns ella regiun. Il menaschi „Lag Salischnas“ duei vegnir menaus duront 10 meins digl onn. Cun las rodund 25 piazzas da lavur che dueien vegnir scaffidas presta il project ina contribuziun considerabla alla valor economica dalla regiun.

Sin fundament d'empremas retschercas ein las sutnumnadas cefras indicativas vegnidadas calculadas. Quellas ston ella proxima fasa vegnir examinadas en detagl.

Investiziuns

1. Erecziun dil lag incl. izolaziun, affluenza ed efflussiun, mesiras ecologicas e lavurs da contuorn, svilup dil project e reserva	frs.	10 milliuns
2. Erecziun dil baghetg principal (incl. gastronomia, gardarobas, recepziun, shop, stanzas multifunzionali)	frs.	2.7 milliuns
Campadi, locals sanitars, loschaments alternativs, reit da vias	frs.	1.7 milliuns
Commercialisaziun, pagas, fasa d'avertura	frs.	0.3 milliuns
total	frs.	4.7 milliuns

La suprastanza communal vul sustener l'uniun tier l'elaboraziun e cuntinuaziun dallas lavurs per transferir il project ella proxima fasa che cuntegn denter auter la tscherca d'investurs ed in gestiunari.

Il credit da planisaziun duei vegnir impundius per crear la basa necessaria per ina decisiun definitiva concernent il project Salischnas entras las votantas ed ils votants.

Diever dil credit da planisaziun

Per cuvierer ils cuosts dallas examinaziuns dil project „Lag Salischnas“ ei in credit da planisaziun brut da 250'000 francs necessaris. Suentar terminaziun dallas lavurs da planisaziun per il project „Lag Salischnas“ san ils cuosts en detagl cun deducziun dallas contribuziuns vegnir presentadas.

Cun il credit da planisaziun dueien las suandontas lavurs vegnir finanziadas:

preproject concept da menaschi	frs.	63'000
preproject erecziun lag da far bogn, detagls menaschi, tscherca da gestiunari	frs.	160'000
nunprovedi/reservas	frs.	27'000
total	frs.	250'000

Ulteriuras informaziuns suondan a caschun dalla radunonza communal entras in representant dil biro specialisau *Quant AG da Flem* che ha elaborau ina studia da potenzial per il project ed il president dall'Uniun Lag Salischnas *Rino Caduff*.

Plan da termins

Il plan da termins sepresenta cun resalva da caussas respectivamein eveniments nunprovedi sco suonda:

2019	concept da menaschi, realisabladad tecnica
2020	exposiziun publica plan da zonas e plan directiv
2020	votaziun credit da baghegiar e lubientscha dils plans
2020	plans d'execuziun
2021	entschatta dallas lavurs
2022	avertura „Lag Salischnas“

Proxim agir

Tenor plan da projectaziun e la procedura da lubientschas eis ei previu da terminar la preprojectaziun incl. las examinaziuns tecnicas e studias da realisabladad entochen la fin 2019. La populaziun duei regularmein vegnir informada davart il svilup dil project ord emprem maun.

Conclusiun

Il project „Lag Salischnas“ duei dar impuls al turissem dalla vischnaunca e dalla Surselva. Igl argument da vendita exclusiv dalla porschida ed il focus sin il hosp da stad duei gidar il Lag Salischnas da survegnir atenziun sin fiera e purtar novs hosps en nossa regiun. La suprastanza communal ei persuadida ch'il project ei ina schanza per il svilup dil turissem en nossa vischnaunca.

Departament economia publica en general

Proposta

La suprastanza communal propona alla radunonza communal da conceder il credit brut da 250'000 francs per la planisaziun dil project Lag Salischnas.

Tractanda 5: Tractaziun ed approvaziun dil project canalisaziun e serenera Pardomat Dado e concessiun dil credit brut da 145'000 francs

La fracziun da Pardomat Dado che s'aua territorialmein tier la vischnaunca da Sumvitg ei ina dallas paucas parts da nosa vischnaunca nua che las auas piarsas ein aunc buca purificadas tenor ils art. 10 ed 11 dalla lescha federala pil schurmetg dallas auas. Cun la disposiziun dils 20 da december 2011 ha la Regenza Grischuna fixau il proceder per la purificaziun dallas auas a Pardomat Dado. Igl onn 2012 survegn la vischnaunca da Sumvitg la lubientscha da saver sliagir il problem dallas auas piarsas a Pardomat ensemen cun la vischnaunca da Mustér, che ha era aunc da purificar las auas a Pardomat Dadens ed a Madernal. Las vischnauncas pertuccadas han incaricau il *biro Cavigelli inschigniers SA da Glion* cun la planisaziun da quei project.

la Spina da Vin da Mustér ed ha per la vischnaunca da Sumvitg neginas grevezias.


Ils cuosts

La part dalla canalisaziun sin intschess dalla vischnaunca da Sumvitg tochen tier la colligaziun dall'emprema casa da Pardomat Dadens (ca. 375 meters), ha la vischnaunca da Sumvitg da sorprendere cun 100 %. Dil rest dalla canalisaziun (ca. 105 meters), sco era la construcziun dalla serenera sezza, vegnan ils cuosts reparti cun 50 % / 50 %.

Tenor il calcul dil biro Cavigelli inschigniers SA da Glion muntan ils cuosts per nosa vischnaunca 145'000 francs.

Quels cuosts secumponan sco suonda:

Canalisaziun, part mo da Sumvitg (100 %)	frs.	89'245
Canalisaziun, part comunabla (50 %)	frs.	25'045
Serenera comunabla (50 %)	frs.	30'710



Plan da situaziun Pardomat Dado e Pardomat Dadens

Il project previu

Il project preveda da colligiar tut ils edificis cun auas piarsas da Pardomat Dado e da menar quellas cun ina nova lingia da canalisaziun da PP dn 125 tochen a Pardomat Dadens. Leu vegn realisau ina serenera comunabla per omisduas vischnauncas. En quei liug, sin territori dalla vischnaunca da Mustér, vegn purificau las auas piarsas da Pardomat Dadens e Dado en ina serenera dil tip SBR (Sequentielle Biologische Reinigung). Silsunter vegn l'aua schubergiada e puspei menada el Rein Anterior. La serenera ei quintada cun 40 valurs da habitont e las duas combras han in cuntegn da mintgamai 15 m³. Ils elements da betun vegnan prefabricai ed han ina peisa totala da bien 35 tonnas.

Igl avantatg principal per ina serenera comunabla ei per omisduas vischnauncas igl aspect dallas finanzas. Ton tier la realisaziun sco era suenter per ils cuosts annuals da menaschi sa cun ina collaboraziun intercomunala vegnir spargnau considerabels cuosts.

Parallel cun il project dalla canalisaziun survegn Pardomat Dado era in niev provediment d'aua. Quel vegn realisau entras

La finanziaziun

Igl uffeci per natira ed ambient ha segirau per quei project ina contribuziun totala da frs. 23'000 (per Sumvitg frs. 11'500). Ils possessurs d'edificis colligiai cun igl implont pagan las contribuziuns da colligaziun tenor il regulativ da taxas tier la lescha davart igl allontanament e la purificaziun dallas auas dalla vischnaunca da Sumvitg.

Departament canalisaziun e serenera

Proposta

La suprastanza communal propona alla radunonza communal d'approbar il project sanaziun canalisaziun e serenera Pardomat Dado e da conceder il credit brut da 145'000 francs.



Tractanda 6: Tractaziun ed approvaziun dil project sanaziun mir santeri Sumvitg e concessiun dil credit brut da 960'000 francs

Igl emprem mir santeri sper il "lanstros" a Sumvitg ei vegnius baghegius el decuors dil 17avel tschentaner e consisteva ord plirs mirs che formavan ina structura da terrassas che lubeva da surmuntar grondas altezias sco a Sumvitg necessari per arrivar si tier la baselgia. Il mir actual ha il cantun baghegiu en connex culla construcziun dalla via cantunala denter Glion e Mustér ils onns 1853 tochen 1855. In protocol dils 14 da fenadur 1854 relata la collaudaziun dalla via cantunala naven dil cunfin cun Trun entochen tier la fontauna amiez Sumvitg. En quei protocol san ins era leger ch'il cantun surdat cun quei di il mir santeri alla vischnaunca en possess e per manteniment.

Buca da far curvien che quei enorm mir ha enteifer tut quels onns survegniu ina u l'autra sfendaglia e che la maula ei tscheu e leu empau sedistaccada. Tochen tier la sanaziun dalla via cantunala H19 la stad 2009 ein quels donns stai en rama d'in process ordinari da vegliadetgna. La stabilitad dil mir ha duront varga 150 onns mai dau ina raschun da far quitaus.

El rom dalla sanaziun dalla via cantunala han ins vuliu sustener ils fundament dil mir imposant punctualmein cun novs blocs da betun. Entras quellas lavurs, ch'ei bein vegnidat fatgas per beinmanegiar, ei la fundaziun dil mir vegnida disturbada essenzialmein e cheutras ei era la stabilitad dil mir ella storta (part convexa) sesminuida.

Gia cuort suenter la finiziun dalla sanaziun dalla via cantunala igl onn 2009, eis ei vegniu constatau marcantas deformaziuns vid il mir, specialmein en la part convexa da quel. Adina puspei sedistacca crappa ord il mir, quei ch'ei in prighel per pedunz e pil traffic sin via.

Mesiraziuns ed analisas

Gia las mesiraziuns dil mir duront las lavurs da sanaziun vid la via cantunala, mo specialmein quellas suenter la sanaziun dalla via, confirman ch'il mir ha giu moviments. Ils pli gronds moviments ein stai cuort suenter la sanaziun dalla via. Naven digl onn 2012 tochen oz vegn il mir examinaus duas gadas per onn cun in sistem da mesiraziun cun scanner. Varga 20 milliuns puncts vegnan registrai e cumparegliai cun las mesiraziuns precedentas e cun l'emprema mesiraziun fatga. Tut quellas mesiraziuns muossan ch'il mir ella storta ei suenter gronds moviments gest suenter las lavurs vid la via ussa bein pli ruasseivels, denton aunc adina en moviment viers anora e ch'el sesbassa era levat.

Ultra da quei eis ei vegniu fatg igl onn 2015 pliras perfuraziuns per sondaschas. Quellas han giu il scopo d'analisar la situaziun geologica e idrogeologica davos il mir sco era per eruir la dimensiu e la consistenza dil mir.

El liug pertuccau ha il mir giu el fundament e tochen sin 5 meters sura ina grossezia da ca. 1.80 meters, il rest ensiviars entochen ella cruna sereducescha la grossezia cuntinuadamein sin ca. 80 cm. En la storta ei il mir ca. 12.60 meters aults.

La via tiel project da sanaziun

En la seduta dils 14 da settember 2015 ha la suprastanza communal surdau l'incarica al *biro d'inschignier Giachen Blumenthal da Glion* d'elaborar in project per la sanaziun dil mir santeri. Giachen Blumenthal ei specialisau sin sanaziuns da mirs vegls e mirs da crappa. La survigilanza dallas lavurs ei vegnida surdada al *biro d'inschignier Deplazes da Surrein*. Medemamein ein era ils responsabels dil cantun vegni involvai el project da sanaziun damai ch'il stan disfavoreivel dil mir periclitoscha era la via cantunala.

Il schaner 2016 ei vegniu presentau pliras variantas sco basa da discussiun. Tenor quellas variantas eis ei stau quintau grob cun cuosts da 700'000 tochen 820'000 francs. Ils specialists sco era ils representants da vischnaunca e cantun han lu decidu da far ulteriuras retschercas per saver rimnar aunc meglieras informaziuns ed aschia saver evitar valetaziuns sbagliadas cun consequenza d'aultas investiziuns fallidas. Per far quei ei il biro da *Baugeologie Chur* vegnius contactaus. Quel ha sclariu ulteriuras damondas aviartas pertuccont la geologia e consistenza dil mir.

La fin matg 2017 ei il preproject cun in concept da mesiras vegnius presentaus. Ei vegn differenziu en quel denter siat differentas metodos per la sanaziun. Ils cuosts svariesschan denter 710'000 ed 1.055 milliuns francs.

Il project da sanaziun

Suenter ina detagliada valetaziun dallas variantas pusseivlas per la sanaziun dil mir ei la varianta che satisfa il meglier allas differentas pretensiuns vegnida elaborada en detagl ensemen cun in calcul dils cuosts.

La sanaziun previda pertucca il tschancun ella storta sin ina lunghezza da rodund 16 meters. Il mir ha cheu ina fuorma convexa e survegn tras quella fuorma dapli tensiuns ch'in mir grad. Ils mirs da mintga vart da quella part che duei vegnir sanada ein stabils e vegnan buca sanai. En entgins onns sto la maula da quels mirs ch'ei per part lucca vegnir remplazzada. Ils mirs sezs ein stabils e ston buca vegnir sanai.

Las lavurs da sanaziun cumpeglian:

- rumper giu il mir existent (en etappas),
- segironza dil scavament cun preits da gunit ed ancras (en etappas),
- construcziun dil mir da sustegn niev en betun armau (altezia ca. 13 m),
- construcziun mir da crappa cun crappa dil mir vegl e cun maula speciala,
- lavurs da fundaziun e catram per cumpart via e passapei cavai si.

Las lavurs entscheivan ils 13 da matg 2019 e cuozzan preventamein entochen miez november.

Il necessari plaz per las lavurs vid il mir pretenda ch'il vial encunter munt dalla via cantunala vegn serraus duront il temps da lavur. Ord quei motiv sto il traffic vegnir dirigius sil vial a val cun cazzolas. Ils loghens per las cazzolas ein gia vegni fixai entras la polizia cantunala. La fermada dallas cazzolas el vest sesanfla gest sper la casa nr. 98 (Via Sursilvana 77) ed egl ost sper il clavau nr. 39B (Via Sursilvana 26).

Il parcadi public sut il mir baselgia vegn serraus durant il temps ch'il traffic sin la via cantunala vegn dirigius sil vial a val tras il vitg. La sortida ord la via cantunala ella Via Catrot vegn durant quei temps medemamein serrada. Tut las autras sortidas ed ils ulteriurs parcadis denter las cazzolas en san vegnir duvrai senza restricziuns, secapescha adina risguardont il traffic.

Damai ch'il vial che resta aviarts pil traffic sto haver ina minimala ladezia ella storta nua ch'il plazzal da lavur ei, vegn era il passapei sin quei tschancun duvraus sco surfatscha pil traffic. Ord quei motiv vegn il passapei denter la casa nr. 83 (Via Sursilvana 29) e la scala che meina giu Fontauna Sut serraus per tuts pedunz. Ils pedunz ston durant quei temps duvraus las vias da Fontauna Sut ni da Sum il Vitg ni il vial sin baselgia e tras il santeri.

Ils 12 da fenadur entochen ils 19 d'ost vegnan las lavurs muort las vacanzas da stad interruttas e la via cantunala dada libra en omisduas direcziuns e quei senza regulaziun dil traffic. Durant quei temps ei era il passapei libers pils pedunz.

En santeri vegn il vial sper il mir sil tschancun nua che las lavurs vegnan fatgas serraus ed il scavament segiraus cun ina seiv da lenn. Pil rest dil santeri dat ei negins impediments e mintga fossa ei da tut temps accessibla. Aschia dat ei era neginas restricziuns tier fiastas da baselgia e sepulturas.

Avon ch'entscheiver cun las lavurs vegn la baselgia examinada e sfendaglias ed auters donns veseivels vegnan registrai en ina aschinumnada cumprova preventiva. L'incarica persuentar ei gia vegnida dada alla Dertgira regionala Surselva sin incarica dalla vischnaunca.

Actualmein ei in expert lundervi d'examinar tgei influenza che las lavurs dil 2009 vid la via cantunala e las mesiras pridias vid ils fundament dil mir santeri han giu sil moviment dil mir e sil svilup dallas sfendaglias. Plinavon fa igl expert era ina proposta co ils cuosts dalla sanaziun dueien vegnir reparti denter la vischnaunca ed il cantun. Per la fin matg duess il pareri digl expert esser avon maun.

Ils cuosts d'investiziun per la sanaziun dil mir santeri che cumpeglian tut ils cuosts dalla sanaziun previda sco era ils cuosts gia occuri per mesiraziuns, sondaschas, giudicaments e planisaziuns muntan:

- installaziuns plazzal da lavur	frs.	75'000
- palancaus	frs.	24'000
- scavament e segironza dil scavament (gunit, ancras)	frs.	167'000
- construcziun mir niev (en betun e crappa)	frs.	317'000
- lavurs da catram	frs.	15'000
- lubientschas, indemnisaziuns, segiradas, cumprovas preventivas	frs.	25'000
- mesiraziuns dil mir	frs.	40'000
- examinaziun dil mir e dil terren	frs.	37'000
- expertisa	frs.	25'000
- projectaziun e survegionza dallas lavurs	frs.	160'000
- diversas e nunprovediu	frs.	75'000
total	frs.	960'000

Ils cuosts da construcziun sebasan sin schazetgs da lavurs semegliontas fatgas ils davos onns. Actualmein cuora la procedura da submissiun e las offertas corrispudentas vegnan inoltradas ils 18 d'avrel. Il di dalla radunonza communal sa vegnir communicau schebein il calcul da cuosts correspunda cullas offertas inoltradas ni sche la damonda da credit sto vegnir adattada a caschun dalla radunonza communal.



Il mir santeri suenter la schubergiada dils 31 da mars 2016

Departament traffic

Proposta

La suprastonza communal propona alla radunonza communal d'approbar il project sanaziun mir santeri Sumvitg e da conceder il credit brut da 960'000 francs.

Tractanda 7: Tractaziun ed approvaziun dalla revisiun parziala dil plan general d'avertura Rabius/Marias

Las frequenzas dil traffic grev sin la via a Rabius atras il quartier da Caho sut via enviars Surrein ein carschidas ils davos onns cuntinudamein. Sin quei tschancun via dat ei strusch pusseivladads da s'entupar per dus camiuns senza untgir sin terren privat. Per impedir che camiuns untgeschan ora sin terren privat ha la gronda part dils proprietaris da terren sper la via montau petgas. Quei ei capeivel damai che negin surpren ils cuosts per metter en uorden ils donns che vegnan caschunai vid ils plazs privats. Consequen-tamein sefatschenta la suprastonza communal gia dapi entgins onns cun la problematica dil traffic sin quella via. Ensemen cun igl uffeci da construcziun bassa dil cantun Grischun ha ella examinau

differentas variantas per sliagir la problematica dil traffic grev. El decuors dils davos onns ein pliras variantas da sviament vegnidas examinadas. Aschia ein studias per las variantas „Marias nord“, „Marias sid“, „Tschuppina“ e „via da mistregn“ vegnidas elaboradas e presentadas alla radunonza communal.


Suenter haver examinau da rudien tut ils avantatgs e disavantatgs dallas differentas variantas ed haver cumparegliau ils cuosts ei la suprastonza communal vegnida tier la conclusiun che la varianta „via da mistregn“ ei per tuts pertuccai la pli efficienta e favoreivla sliagiazun.

A caschun dalla radunonza communal dils 14 da december 2018 ha la suprastonza communal presentau quella varianta e proponiu da sustener quella. Ina clara maioritad da 89.3 % dalla radunonza communal ha dau suatientscha a questa proposta ed aschia dau glisch verda per prender enta maun la procedura d'ina revisiun parziala dil plan general d'avertura per la varianta „via da mistregn“.

Proxim agir

La via cantunala existenta naven da Rabius en viers Surrein ei en in fetg schliet stan. Il cantun vul perquei sanar proximamein quella. En connex cun quella sanaziun vegn il sutpassadi dalla lingia da viafier ch'ei gia daditg buca sufficients sbassaus. La sanaziun da quella via cantunala succeda entras il cantun senza che la vischnaunca ni privats ston separticipar vid ils cuosts. Avon ch'entscheiver cun quella sanaziun giavischa il cantun denton che la revisiun parziala dil plan general d'avertura vegni approbada.

Ina preexaminaziun dalla revisiun previda ei gia succedida entras igl uffeci pil svilup dil territori dil cantun Grischun. L'exposiziun publica dil plan ed il rapport leutier ha giu liug duront 30 dis naven dils 28 da december 2018 entochen ils 28 da schaner 2019. Damai ch'igl ei buca vegniu inoltrau protestas encunter la revisiun parziala dil plan general d'avertura vegn la revisiun ussa suttamessa alla radunonza communal.



Plan revisiun parziala dil plan d'avertura

Trassé dalla via

La via existenta per diever agricul e forestal denter la fin dalla via da rimnada (Via Curtins) a Marias (parcella nr. 450) ed igl ur dalla zona da baghegiar a Rabius (Via Sutvitg, parcelas nr. 312, 4986) vegn midada en ina via da mistregn (traffic da mistregn, agricul e traffic grev sur 3.5 tonnas lubiu).

Damai ch'il trassé da quella via ei vegnius catramaus avon dus onns daniev sto la „via da mistregn“ actualmeim aunc buca vegnir realisada, aschia ch'ei seresulta momentan negins cuosts per la vischnaunca.

La suprastonza communal ei perschudada suenter la liunga fasa d'examinaziun che la varianta „via da mistregn“ ei la varianta la pli adattada. Cun questa varianta sa la problematica dil traffic grev vegnir sliagiada a Rabius ed il cantun sa sanar la Via Surrein.

Departament planisaziun locala

Proposta


La suprastonza communal propona alla radunonza communal d'approbar la revisiun parziala dil plan general d'avertura Rabius/Marias.

Tractanda 8: Tractaziun ed approbaziun dalla revisiun parziala dil plan general d'avertura Laus

La fracziun da Laus ei in liug che vegn apprezziaus sco punct da partenza per viandonts. Dapresent dat ei neginas pusseivladads da parcar igl auto sin terren communal el vitget da Laus. Aschia vegnan ils autos adina puspei parcai sin terren privat. En connex cun la meglieraziun funsila eis ei vegniu partiu tier alla vischnaunca sin la parcella nr. 6645 terren che fuss adattaus per realisar parcadis publics.

Per saver realisar quels parcadis sto il plan general d'avertura vegnir revedius. Ina preexaminaziun dalla revisiun previda ei gia succedida entras igl uffeci pil svilup dil territori dil cantun Grischun. L'exposiziun publica dil plan ed il rapport leutier ha giu liug duront 30 dis naven dils 28 da december 2018 entochen ils 28 da schaner 2019. Damai ch'igl ei buca vegniu inoltrau protestas encunter quella revisiun parziala dil plan general d'avertura vegn ella suttamessa alla radunonza communal.

Departament planisaziun locala



Plan revisiun parziala dil plan d'avertura

Proposta

La suprastonza communal propona alla radunonza communal d'apportar la revisiun parziala dil plan general d'avertura Laus.

Informaziuns cuortas

Uras d'avertura deponia da verd Igniu

Per saver ademplir las determinaziuns surordinadas pertuccont il scamond da perver las selvaschinas e per megliurar igl uorden dalla deponia da verd ha la vischnaunca eregiu boxas per la dismessa da curdem verd a Rabiun-Igniu. Da niev dat ei uras d'avertura ed in concept da survigilonza per la deponia verda. La deponia ei dapi ils 30 da mars 2019 aviarta sco suonda:

- mardis: 17.00 – 20.00 uras
- gievgia: 17.00 – 20.00 uras
- sonda: 09.00 – 12.00 uras

Il suandont ei lubiu da dismetter:

Deponia da caglias

- caglias e roma cun diameter sur 4 cm
- bests da plontas
- pignola senza material jester

Deponia da verd

- roma, dascha e caglias cun diameter entochen 4 cm
- fluras
- tagl da pastget e prau
- fein e strom
- feglia, zerclen e puma curdada
- fluras da balcon e da ruogs cun tratsch, denton senza ruog
- curdems da preparar fretgs, puma e legums
- cordas e sacs cumpostibels
- scorsa
- resgem e stialas da lenna buca tractada
- crosas d'ovs
- fundagl da caffè e jarvas da te

Il suandont ei scumandau da dismetter:

- lenna veglia e da baghetg
- ruogs da matgs
- tschendra
- cuschas
- cordas e sacs buca cumpostibels
- plastic
- vanzadiras da spisas cuschinadas
- neofitas (flurs nuscheivlas)
- crappa
- curdems da baghetg e blococonts
- capslas da caffè e te
- glas
- medicaments
- metal, alu e cuppas
- textilias
- sacs da tschetschapuorla
- battarias ed ielis
- pupi e cartun
- rumien electronic
- curdems da casa

Nus supplichein per enconuschientscha e capientscha.

Departament ambient

Editura

Vischnaunca Sumvitg, Via Quadras Su 10, 7175 Sumvitg
telefon: 081 920 25 00, fax: 081 920 25 08,
e-mail: info@sumvitg.ch